

**Naaja H. Nathanielsen
Attaviitsoq**

**UPA2016/86
21. april 2016**

Inatsisartut aalajangiiffigisassatut siunnersuut, Naalackersuisut peqquneqassasut neqerooruteqartarnermut inatsimmut allannguutissanik siunnersuuteqarnissaannik, sanaartornermi suliallit nunatta pissarititaanik atuinissamik kissaateqartut tapersersorneqarnissaat siunertaralugu.

(Inatsisartunut ilaasortat Aqqaluaq B. Egede, Inuit Ataqtigiit aamma Per Rosing-Petersen, Partii Naleraq)

Siunnersuutip siunertaa tapersornarpoq. Kisianni tamakkiisumik paasisinnaangilara neqerooruteqartarnermut inatsit tassaassasoq allannguiffigisariaqartoq, nunatsinni tunisassianik sanaartornermi atuinerulernissaq tikinniassagaanni. Paasinnittaaserami naapertorlugu nunatsinni sanaartugassanik atuinerulernissaanik anguniagaqarneq, sanaartortunik atuinertunik tapersersuinikkut kisimi anguneqarsinnaangilaq. Taakkumi atuerusunngippata inatsimmik allannguneq isumaaruttussaavoq. Siunnersuuteqartut nammineerlutik iserfigaat sanaartortarnerup iluani pisortaqarfinnilu qularneq ingerlariaqqikkumanginnerlu nunatsinni sanaartornermi tunisassianik atuinerulernissamut kigaallassaataasinnaasut. Taamaattumik isumaqarpunga neqeroortarnermut inatsit kisiat allannguiffigissallugu naammanngitsoq. Nunatsinni tunisassianik atuinerulernissaq ineriartortinneqassappat takussaanerulersinneqarlunilu, aamma allani iliuuseqartoqartariaqarpoq. Soorlu Greenland Businessimut aningaasaliinerunikkut, aallartisartunik aamma sanaartornerup iluani nunatsinni tunisassianik ineriartortitsinerulernissamik aningaasarsiorfinngorsaanermillu ineriartortitsinernik ukkataqarnerulernikkut. Aamma Namminersorlutik Oqartussaniit iliuuseqarnerulerneq aqutaasinnaavoq, soorlu Ineqarnermut, Sanaartornermut Attaveqatigiinnermullu Naalackersuisoqarfimmi misileraaffissamut aningaasaliisoqaqqammersoq. Siunnersuut Inuussutissarsiornermut ataatsimiititaliamut innersuuppara, siunnersuutigalugulu ataatsimiititaliap eqqartussagaat siunnersuutip siunertaa qanorlu tamassuma angunissaata pitsaanerpaamik qulakkeerneqarnissaa. Imaassinnaavoq taasissutigineqartussaq allanngortinneqartariaqassasoq. Isumarli tapersersornarpoq siunnersuullu tapersersorpara.